

**STATUT
LABURISTIČKE STRANKE BOSNE I HERCEGOVINE
(Prečišćeni tekst)**



Velika Kladuša, januar 2018. godine

SADRŽAJ

SADRŽAJ	I
I OPĆE ODREDBE	1
Naziv i sjedište Stranke	1
Znak i druga obilježja Stranke	2
Pečat Stranke	2
Predstavljanje i zastupanje	2
Način informiranja javnosti	2
Upotreba rodno osjetljivog jezika	2
II OSNOVNI CILJEVI STRANKE	3
Ostvarivanje programskih ciljeva	3
Stranačka glasila	3
III ČLANSTVO U STRANCI	4
Počasni član stranke	4
Obaveze dužnosnika, zastupnika i vijećnika	5
Prestanak članstva	5
IV ODNOSI U STRANCI	6
Donošenje odluka	7
V UNUTRAŠNJA ORGANIZACIJA I ORGANI STRANKE	7
Općinska organizacija/ogranak sa podružnicama	8
Skupština općinskog ogranka	8
Predsjedništvo općinskog ogranka	9
Gradska organizacija	11
Kantonalna/regionalna organizacija i Distrikt Brčko	11
Centrani organi Stranke	11
Kongres	11
Glavni odbor	12
Predsjedništvo Stranke	13
Predsjednik Stranke	15
Generalni sekretar	16
Portparol Stranke	16
VI IZBORI, KANDIDIRANJE I OPOZIV	17
VII KANDIDIRANJE I UČEŠĆE U VLASTI	17
VIII IMOVINA, STICANJE, KORIŠTENJE I RASPOLAGANJE SREDSTVIMA STRANKE	18
IX PRESTANAK RADA STRANKE	19
X PRIJELAZNE I ZAVRŠNE ODREDBE	19

U skladu sa odredbama Odluke o izmjenama i dopunama Statuta Laburističke stranke Bosne i Hercegovine broj: K-I-03/17 od 28.12.2017. godine, Predsjednik Stranke utvrđuje prečišćeni tekst Statuta Laburističke stranke BiH.

Prečišćeni tekst obuhvata Statut Laburističke stranke BiH koji je usvojila Osnivačka skupština Stranke, dana 28.12.2013. godine i Izmjene i dopune statuta Laburističke stranke BiH koje je usvojio Kongres Stranke, dana 28.12.2017. godine.

S T A T U T

LABURISTIČKA STRANKA BIH - Laburisti BiH (Prečišćeni tekst)

I OPĆE ODREDBE

Član 1.

Laburistička stranka BiH (u daljnjem tekstu Stranka) politička je stranka, osnovana u svrhu udruživanja građana Bosne i Hercegovine kojima je rad osnova ličnog i društvenog napretka, moralnih vrijednosti, kao i sredstvo da svoju političku volju izraze zastupanjem u predstavničkim, zakonodavnim tijelima u Bosni i Hercegovini i na funkcijama čiji se izbor vrši na izborima. Laburistička stranka BiH je otvorena za pripadnike svih naroda i nacionalnih manjina koji prihvataju Program i Statut ove stranke. Laburistička stranka BiH prihvata europske standarde i budućnost Bosne i Hercegovine vidi u zapadnoeuropskim integracijama.

Član 2.

Ovim Statutom LABURISTIČKA STRANKA BIH uređuje i utvrđuje: svoj naziv, sjedište, znak i druga obilježja Stranke, predstavljanje i zastupanje, način informiranja javnosti, ciljeve, članstvo u stranci, odnosi u Stranci, unutrašnja organizacija i organi Stranke, načine njihova izbora i opoziva, kandidiranje i učešće u vlasti, imovina, sticanje, korištenje i raspolaganje sredstvima Stranke, prestanak rada, te druga pitanja od interesa za članstvo i rad Stranke.

Član 3.

(Naziv i sjedište Stranke)

Naziv Stranke je "Laburistička stranka BiH".

Stranka se može punim i skraćenim nazivom koristiti i na ćirilicom pismu.

Naziv Stranke na engleskom jeziku je "Labour Party BiH".

Skraćeni naziv Stranke je „Laburisti BiH“.

Stranka ima svojstvo pravnog lica.

Sjedište Stranke je u Velikoj Kladaši, Ibrahima Mržljaka 84.

Stranka djeluje na cijelom području Bosne i Hercegovine.

Član 4.
(Znak i druga obilježja Stranke)

Stranka ima svoj znak i zastavu.

Član 5.
(Pečat Stranke)

Stranka ima pečat.

Pečat imaju i organizacijski oblici Stranke koji je identičan pečatu Stranke, stim što se u drugom krugu ruba pečata upisuje naziv i sjedište organizacionog oblika.

Član 6.
(Predstavljanje i zastupanje)

Stranku u javnom i političkom radu predstavlja i zastupa predsjednik Stranke, a u slučaju njegove spriječenosti zamjenik predsjednika Stranke, u skladu sa Programom, ovim Statutom i zakonskim propisima Bosne i Hercegovine. U slučaju privremene spriječenosti predsjednika i zamjenika predsjednika, Stranku predstavlja jedan od potpredsjednika, kojeg za to ovlasti predsjednik, a u njegovoj nemogućnosti Predsjedništvo Stranke svojom posebnom odlukom.

Član 7.
(Način informiranja javnosti)

Rad Stranke je javan. Zvanična komunikacija Stranke s javnošću odvija se posredovanjem portparola i Službe za odnose s javnošću, kao i drugih ovlaštenih dužnosnika stranke, na način kako to utvrdi Predsjedništvo Stranke.

Javnost se može isključiti iz rada pojedinih tijela Stranke kada se odlučuje o unutarstranačkim pitanjima odlukom Predsjedništva Stranke.

Član 8.
(Upotreba rodno osjetljivog jezika)

Izrazi koji se u ovome Statutu koriste u muškom prirodnom rodu, podrazumijevaju ili obuhvataju i iste takve izraze za osobe ženskoga roda.

II OSNOVNI CILJEVI STRANKE

Član 9.

Polazeći od svoga Programa Stranka se u svom djelovanju zalaže za sveobuhvatan razvoj Bosne i Hercegovine kroz:

Razvoj tržišne privrede i zaštita državne i privatne svojine;
Vladavinu prava i afirmacija pravne sigurnosti;
Decentralizaciju i ravnomjeran regionalni razvoj;
Zaštitu i unapređenje ljudskih prava i temeljnih sloboda;
Socijalnu pravdu i društvenu solidarnost;
Zaštitu prava manjina u skladu sa međunarodnim standardima;
Zaštitu i unapređenje životne sredine;
Regionalnu suradnju, te integracija u europske i euroatlantske strukture;
Izgradnju Bosne i Hercegovine kao demokratske države ravnopravnih konstitutivnih naroda i svih građana koji u njoj žive;
Uspostavu društva čije će institucije, u funkcionalnom smislu, služiti građanima.

Član 10.

(Ostvarivanje programskih ciljeva)

Programske ciljeve Stranka ostvaruje djelovanjem u javnom životu i vršenjem vlasti. Jedan od mogućih oblika djelovanja Stranke jesu predizborne ili postizborne koalicije, o čemu odlučuje Glavni odbor Stranke u skladu sa Statutom.

Član 11.

Stranka saraduje s drugim strankama, organizacijama, pokretima i udruženjima u Bosni i Hercegovini i inostranstvu istih ili sličnih programskih načela i ciljeva. Stranka se može temeljem odluke Predsjedništva Stranke, a uz prethodnu suglasnost Glavnog odbora Stranke, učlanjivati u međunarodna udruženja srodnih stranaka, ako to pridonosi ostvarivanju njenih programskih ciljeva.

Član 12.

(Stranačka glasila)

Stranka ima svoju web stranicu, a može imati i druga stranačka glasila. Stranka će se radi ostvarivanja svoga programa služiti i ostalim sredstvima javnog saopštavanja.

III ČLANSTVO U STRANCI

Član 13.

Članom Stranke može postati svaki punoljetan, poslovno sposoban građanin Bosne i Hercegovine, koji prihvata Statut i Program. Članom Stranke postaje se potpisom pristupnice i upisom u Registar članova. Prijem novih članova Stranke mogu izvršiti svi organi na svim nivoima organiziranja stranke. Potpisana pristupnica dostavlja se nadležnoj općinskoj organizaciji u kojoj novoprimljeni član ima prebivalište. Registar članova vodi Sekretar. Članom Stranke ne može postati građanin koji je član druge političke stranke registrirane u Bosni i Hercegovini. Na prijedlog Predsjedništva općinskog ogranka Predsjedništvo Stranke može osporiti upis u registar novih članova Stranke. Član Stranke dobiva člansku iskaznicu čiju formu i izgled propisuje Predsjedništvo Stranke. Članstvo u Stranci dokazuje se članskom iskaznicom.

Član 14.

(Počasni član Stranke)

Stranka može imati svoje počasne članove. Na prijedlog Predsjedništva Skupština Općinskih ogranaka, počasne članove proglašava Glavni odbor Stranke. Članovima i počasnim članovima te drugim fizičkim i pravnim osobama mogu se dodjeljivati priznanja u skladu s Pravilnikom koji donosi Predsjedništvo Stranke.

Član 15.

Član Stranke ostvaruje prava u ogranku kojem pripada, te sudjeluje u radu svih tijela kojih je član, u političkom oblikovanju Stranke, raspravljanju, predlaganju, podnošenju zahtijeva te odlučivanju na sjednicama. Obaveza je člana redovito dolaziti na sastanke organizacija odnosno tijela kojih je član, pridržavati se Statuta, Pravilnika i Etičkog kodeksa ponašanja.

Član 16.

Svaki član pripada Općinskom ogranku Stranke prema mjestu prebivališta. U slučaju promjene mjesta prebivališta, član je dužan odmah odjaviti se u postojećem ogranku kao uvjet upisa u drugi ogranak.

Član 17.

Član Stranke ima pravo:

- a) da učestvuje u kreiranju i ostvarivanju politike Stranke;
- b) da bira i bude biran u organe Stranke;
- c) da kandiduje i da se kandiduje za sve funkcije u Stranci;
- d) da ravnopravno učestvuje u aktivnostima Stranke;
- e) da iznosi kritike na rad organa Stranke;

- f) da izražava mišljenja i gledišta koja su drugačija od mišljenja većine;
- g) da bude informiran o aktivnostima Stranke;
- i) da ostvaruje i druga prava u skladu sa Statutom i drugim aktima Stranke.

Član 18.

Član Stranke ima obavezu:

- a) da prihvata program i Statut Stranke;
- b) da zastupa i aktivno sprovodi politiku Stranke i odluke organa Stranke, pri čemu je mjerodavna odluka višeg organa Stranke;
- c) da radi na očuvanju ugleda Stranke i pridobija nove članove;
- d) da svojim angažmanom u izbornoj kampanji aktivno doprinosi uspjehu Stranke na izborima;
- e) da ispunjava i druge obaveze u skladu sa Statutom i ostalim aktima Stranke.

Član 19.

(Obaveze dužnosnika, zastupnika i vijećnika)

Dužnosnici, zastupnici i vijećnici obavezni su izvješćivati o svom radu i raspravljati s članovima o svim političkim pitanjima iz područja njihova djelokruga, te se odazvati na svaki obrazloženi poziv svoga temeljnog ogranka ili organizacije. Članovi Stranke koji su izabrani kao zastupnici u zakonodavnim tijelima BiH, entiteta, kantona, gradova i općina ako prijeđu u drugu stranku, osnuju novu stranku ili žele postati neovisnima dužni su nadoknaditi nastalu štetu.

Član 20.

Odluku o visini članarine donosi Predsjedništvo Stranke, pri čemu će uzeti u obzir imovno stanje članova.

Evidenciju o plaćanju članarine vodi Sekretarijat Stranke.

Član 21.

(Prestanak članstva)

Članstvo u Stranci prestaje smrću člana, istupanjem, isključenjem, podnošenjem ostavke na članstvo ili dužnost u zastupničkim, izvršnim i drugim tijelima vlasti, bez prethodne suglasnosti Glavnog odbora Stranke.

Iz Stranke se istupa davanjem pisane izjave ili vraćanjem članske iskaznice.

Isključenje iz Stranke izriče se za:

- a) članstvo, djelovanje i kandidaturu u drugoj stranci;
- b) davanje potpisa podrške drugoj stranci ili nezavisnom kandidatu bez suglasnosti Predsjedništva Stranke;
- c) djelovanje koje je u suprotnosti s osnovnim principima, ciljevima Stranke;
- d) kršenje Statuta Stranke;
- e) nepoštivanje obaveza vijećnika, odnosno, zastupnika / poslanika.

Član Stranke ne može ponovo pristupiti Stranci prije isteka roka od četiri godine od dana isključenja iz Stranke. Prestanak članstva upisuje se u Registar članova.

Član 22.

Postupak za brisanje iz evidencije članstva, pokretanje postupka radi utvrđivanja odgovornosti, izricanje mjere isključenja mogu pokrenuti Skupština općinskog ogranka s 2/3 delegata, Predsjedništvo općinskog ogranka i viši organi Stranke.

Član 23.

Odluku o isključenju iz Stranke donosi Skupština općinskog ogranka. Na Odluku o isključenju iz Stranke se može podnijeti žalba Glavnom odboru Stranke u roku od 15 dana od dana donošenja. Glavni odbor Stranke može tražiti stručno mišljenje od vanjskih saradnika, eksperata, a za račun podnositelja žalbe. Odluku o žalbi na odluku o isključenju donosi Predsjedništvo Stranke na prvoj narednoj sjednici nakon prijema mišljenja Glavnog odbora Stranke.

IV

ODNOSI U STRANCI

Član 24.

Odnosi u Stranci zasnivaju se na principu demokratskog jedinstva.

Princip demokratskog jedinstva znači:

- a) poštivanje slobode mišljenja i slobode izražavanja unutar Stranke,
- b) uvažavanje odluka većine i obavezu njihovog ostvarivanja u praksi,
- c) prava manjine i svakog pojedinca da zadrži i u Stranci izražava vlastito mišljenje i gledišta,
- d) pravo da se traži preispitivanje odluka organa Stranke, ako se za to izjasni 1/3 članova datoga organa.
- e) sve funkcije u Stranci jednako su dostupne ženama i muškarcima. Ukupna kadrovska politika u Stranci baziraće se na punoj afirmaciji uključivanja predstavnika sindikata i radnika.

Član 25.

U aktivnostima Stranke, na svim nivoima organiziranja i oblicima djelovanja, mogu učestvovati i simpatizeri Stranke bez prava odlučivanja.

Član 26.

U Stranci formira se Fond opće solidarnosti Stranke. Odluku o načinu organiziranja, zadacima i radu Fonda solidarnosti donosi Predsjedništvo Stranke uz suglasnost Glavnog odbora Stranke.

Član 27.

U cilju realizacije programske Platforme ekonomskog razvoja i borbe protiv bijede, nezaposlenosti

i siromaštva Stranka formira tijelo "Stručni ekonomski savjet" na čelu s glavnim ekonomskim Strategom. Formira se Tijelo za pravnu zaštitu članova Stranke, a po potrebi i tijela za druga pitanja. Predsjedništvo Stranke bliže određuje ciljeve, sadržaj, načine i oblike rada Tijela, te njegovo imenovanje. Osnivači Stranke, odnosno Inicijativni odbor za osnivanje Stranke imaju poseban status, a Predsjedništvo Stranke će to preciznije odrediti svojom odlukom.

Član 28.
(Donošenje odluka)

Ukoliko nije drugačije određeno odlukom Glavnog odbora Stranke, organi Stranke donose odluke javno, na sjednici kojoj prisustvuje većina izabranih članova i na kojoj se za prijedlog odluke izjasni većina prisutnih.

Član 29.

Predsjedništvo Stranke, svojom odlukom, raspisuje prve unutarstranačke izbore . Predsjedništvo Stranke utvrđuje kriterije i postupak izbora članova organa Stranke uz suglasnost Glavnog odbora. Mandat organa Stranke traje, u pravilu, četiri godine. Mandat Predsjednika i zamjenika predsjednika Stranke izabranog na redovnom Kongresu traje četiri godine, te isti mogu biti ponovo birani više puta. Članu organa Stranke prestaje mandat prije isteka vremena na koje je izabran, prestankom članstva u Stranci, podnošenjem ostavke ili odlukom organa koji ga je izabrao.

Članu organa Stranke, koji neprekidno, u trajanju od tri mjeseca, neopravdano odsustvuje sa sjednica organa Stranke, prestaje mandat u tom organu.

V
UNUTRAŠNJA ORGANIZACIJA I ORGANI STRANKE

Član 30.

Stranka se organizira na teritorijalnom i interesnom principu:

Općinske organizacije,
Gradske organizacije,
Kantonalne/regionalne organizacije i Distrikt Brčko,
Centralni organi Stranke.
Stranka može osnivati i podružnice u dijaspori.

Član 31.

U kantonima/regijama, gradovima, općinama i naseljima, gdje nisu osnovane organizacione jedinice Stranke, kao privremeni oblik organiziranja, djeluju povjereništva ili povjerenici stranke odlukom Predsjedništva Stranke.

Član 32.

U Stranci djeluje posebna organizacija mladih članova i simpatizera Stranke. Glavni odbor Stranke a na prijedlog Predsjedništva Stranke, donosi odluku o organiziranju Organizacija mladih Stranke. Organizacija mladih Stranke odlukom bliže uređuje način svoga organiziranja i djelovanja uz saglasnost Predsjedništva Stranke.

Član 33.

U Stranci djeluje posebna organizacija žena – članica i simpatizerki Stranke. Glavni odbor Stranke a na prijedlog Predsjedništva Stranke, donosi odluku o organiziranju Organizacije žena Stranke. Organizacija žena Stranke odlukom bliže uređuje način svoga organiziranja i djelovanja uz saglasnost Predsjedništva Stranke.

Član 34.

(Općinska organizacija/ogranak sa podružnicama)

Općinski ogranak Stranke je temeljni oblik povezivanja i organiziranja članova Stranke. Područje djelovanja općinskog ogranka Stranke odgovara u pravilu administrativno-teritorijalnom području općine, osim podružnica koje se osnivaju u dijaspori o čemu Predsjedništvo stranke donosi posebnu odluku.

Član 35.

Članovi Stranke povezani u općinski ogranak Stranke, organiziraju se i djeluju u podružnicama osnovanim u naseljima, mjesnim zajednicama ili kvartovima grada na području općinskog ogranka u skladu sa ovim Statutom i sa odlukom Predsjedništva stranke. Odluku o osnivanju općinskog ogranka sa ili bez podružnica donosi Predsjedništvo stranke. Za osnivanje općinskog ogranka potrebno je prisustvo najmanje 15 registriranih članova sa mjestom prebivališta u općini za koju se osniva ogranak.

Član 36.

Organi općinskog ogranka su: skupština i predsjedništvo.

Član 37.

(Skupština općinskog ogranka)

Skupština je najviši organ općinskog ogranka Stranke. U skupštinu općinskog ogranka po funkciji ulaze: članovi predsjedništva općinskog ogranka, predsjednik općinskog ogranka, predsjednici podružnica, vijećnici općinskog vijeća, poslanici na višim nivoima vlasti, predstavnici Stranke u izvršnoj vlasti na svim nivoima, predsjednici interesnih asocijacija Stranke osnovanih na nivou ogranka.

Skupština ima predsjednika i zamjenika predsjednika Skupštine.

Član 38.

Skupštinu općinske organizacije čine članovi Stranke koji imaju mjesto prebivališta u Općini u kojoj djeluje općinska organizacija. U Izornoj Skupštini mogu odlučivati svi članovi Stranke koji pripadaju toj općinskoj organizaciji uz uvjet da su članovi stranke najmanje godinu dana neprekidno prije održavanja Izborne Skupštine i da su podmirili obveze plaćanja članarine.

Član 39.

Skupština općinskog ogranka ima slijedeće nadležnosti:

Tajnim glasanjem ili na drugi način a po odluci Predsjedništva Stranke bira i razrješava: predsjednika i zamjenika predsjednika skupštine, predsjednika općinskog ogranka, koji je ujedno i predsjednik predsjedništva, članove predsjedništva općinskog ogranka, od kojih su prva dva sa najviše glasova potpredsjednici, delegate općinskog ogranka za Kongres Stranke, donosi Poslovnik o radu skupštine, razmatra i usvaja izvještaj i program rada općinskog ogranka i predsjednika općinskog ogranka, obavlja i druge poslove predviđene Poslovnikom i Statutom.

Član 40.

Sjednice Skupštine općinskog ogranka održavaju se po potrebi, a najmanje jedanput godišnje. Rad skupštine odvija se po Poslovniku kojeg donosi skupština. Skupštinu saziva predsjednik, a ako je predsjednik spriječen ili ne saziva Skupštinu u roku od 3 mjeseca po isteku godine dana od saziva zadnje Skupštine, istu može sazvati i zamjenik predsjednika Skupštine. Ukoliko Predsjednik skupštine i zamjenik predsjednika Skupštine ne sazove sjednicu u predviđenim rokovima, odbiju prijedlog za sazivanje sjednice ili na drugi način pokuša izbjeći njezino sazivanje - sjednicu, u roku od osam dana, saziva Predsjednik Stranke, kao organ koji osigurava jedinstveno i cjelovito funkcioniranje Stranke, te isti Predsjedava Skupštinom.

Ukoliko niko od naprijed navedenih dužnosnika stranke ne sazove Skupštinu u predviđenim rokovima, pravo na sazivanje ima 1/3 delegata Skupštine, odnosno 1/3 članova stranke koji pripadaju općinskom ogranku koji su evidentirani kao članovi.

Predsjedništvo Stranke svojom odlukom raspisuje prve unutarstranačke izbore na Općinskom / gradskom nivou.

Član 41.

(Predsjedništvo općinskog ogranka)

Predsjedništvo općinskog ogranka čine: predsjednik općinskog ogranka, dva potpredsjednika, predsjednik kluba vijećnika općinskog vijeća, nosioci vlasti u općini iz reda Stranke, predsjednik organizacije mladih, predsjednica organizacije žena, izabrani članovi predsjedništva na izornoj sjednici Skupštine općinskog ogranka.

U predsjedništvo općinskog ogranka po funkciji ulaze i Predsjednici podružnica općinske organizacije.

Član 42.

Predsjedništvo općinskog ogranka u sastav predsjedništva može kooptirati 1/3 novih članova u odnosu na broj izabranih članova predsjedništva. Odluku o kooptiranju novih članova donosi Predsjedništvo općinskog ogranka uz saglasnost Predsjedništva Stranke.

Član 43.

Predsjedništvo općinskog ogranka na svojoj prvoj konstituirajućoj sjednici bira sekretara i blagajnika općinskog ogranka. Sjednice Predsjedništva općinskog ogranka saziva i njima predsjedava predsjednik, a u njegovoj odsutnosti, jedan od potpredsjednika ogranka uz saglasnost Predsjedništva Stranke. Sjednice Predsjedništva općinskog ogranka se održavaju po potrebi a najmanje jednom u tri mjeseca. Ukoliko Predsjednik općinskog ogranka ne sazove sjednicu u predviđenom roku, odbije prijedlog za sazivanje sjednice ili na drugi način pokuša izbjeći njezino sazivanje - sjednicu, u roku od pet dana, saziva Predsjednik Stranke, kao organ koji osigurava jedinstveno i cjelovito funkcioniranje Stranke, te određuje člana Predsjedništva općinskog ogranka koji će tu sjednicu voditi.

Član 44.

Nadležnosti i ovlaštenja Predsjedništva općinskog ogranka su: organizira provođenje politike Stranke i izvršenje programa općinske organizacije, provodi odluke Skupštine i odluke viših organa Stranke, potiče omasovljavanje članstva, te obavlja i druge poslove po odluci Predsjedništva Stranke.

Član 45.

Podružnica se u pravilu osniva na području jedinice mjesne samouprave (mjesna zajednica, gradska četvrt, naselje) u općini u kojoj je osnovana općinska organizacija, s ciljem uspostavljanja što svrsishodnije teritorijalne organizacije stranke, te ostvarivanja politike mjesne samouprave.

Član 46.

Podružnica se osniva kada na njenom prostoru djelovanja ima najmanje pet članova Stranke. Broj članova Skupštine, kao i druga pitanja za rad određene podružnice određuje Predsjedništvo općinskog ogranka uz saglasnost Predsjedništva Stranke.

Član 47.

Brisan.

Član 48.

Brisan.

Član 49.

(Gradska organizacija)

Gradska organizacija Stranke osniva se na području gradova koji su ustrojeni kao jedinstvena gradska cjelina, sastavljena iz jedne ili više općina. Odluku o formiranju, načinu rada i djelovanja gradske organizacije donosi Predsjedništvo Stranke.

Član 50.

(Kantonalna/regionalna organizacija i Distrikt Brčko)

Kantonalna organizacija Stranke ustrojava se na području kantona saglasno administrativno-teritorijalnom ustrojstvu Federacije Bosne i Hercegovine, odnosno na području regije, saglasno ustroju Republike Srpske. Distrikt Brčko kao posebno administrativno-teritorijalna cjelina u okviru Bosne i Hercegovine, u organizaciji Stranke ima status kantonalne organizacije. Odluku o formiranju, načinu rada i djelovanja kantonalne/regionalne organizacije donosi Predsjedništvo Stranke.

Član 51.

(Centralni organi Stranke)

Centralni organi Stranke su: a) Kongres, b) Glavni odbor, c) Predsjedništvo, d) Predsjednik, e) Generalni sekretar, f) Portparol.

Član 52.

(Kongres)

Kongres je najviši organ Stranke i njegove odluke obavezne su za članove i organe Stranke. Kongres se saziva prema potrebi, a najmanje jedanput u četiri godine. Na osnovu odluke Glavnog odbora, Kongres može biti redovni ili vanredni. Pripreman za održavanje Kongresa rukovodi poseban ad hoc Odbor, kojeg na prijedlog Predsjedništva Stranke, bira Glavni odbor. Odluku o sazivanju vanrednog Kongresa Glavni odbor donosi u skladu sa Statutom ili na osnovu inicijative najmanje pet kantonalnih/regionalnih organizacija.

Član 53.

Kongres Stranke čine: delegati Kongresa, tj. predstavnici Općinskih organizacija Stranke srazmjerno broju članova i drugim kriterijima koje definira Glavni odbor uz saglasnost Predsjedništva Stranke. Članovi Kongresa po funkciji: predsjednici općinskih organizacija, predsjednici kantonalnih/regionalnih organizacija, članovi Centralnih organa Stranke iz člana 51. ovog Statuta, izuzev tačke a), vijećnici općinskih vijeća, poslanici Kantonalnih skupština, poslanici u Parlamentarnoj skupštini BiH, poslanici u Parlamentu FBiH, Narodnoj skupštini Republike Srpske, delegati u Skupštini Distrikta Brčko, dužnosnici u izvršnoj vlasti iz reda Stranke na svim nivoima vlasti u BiH.

Član 54.

Nadležnosti Kongresa su: Kongres utvrđuje politiku Stranke, ocjenjuje rad organa koje bira, donosi Program i Statut Stranke, te rješava druga pitanja u skladu sa Poslovníkom o radu. Bira i razrješava predsjednika Stranke, članove Predsjedništva, članove Glavnog odbora. Na prijedlog Glavnog odbora, Kongres može donijeti i odluku o prestanku rada Stranke, te o postupanju sa imovinom Stranke u takvim slučajevima. Kongres donosi Poslovníkom o svome radu.

Član 55.

Kongres saziva i njime predsjedava do izbora radnog predsjedništva Predsjednik Stranke. Kongres stranke može određene poslove i ovlaštenja prenijeti na Glavni odbor.

Član 56.

(Glavni odbor)

Glavni odbor je najviši organ Stranke između dva zasjedanja Kongresa.

Glavni odbor čine: izabrani članovi Predsjedništva Stranke, predsjednici kantonalnih/regionalnih organizacija, poslanici u Parlamentarnoj skupštini BiH, Parlamentu F BiH i Narodnoj skupštini RS, funkcioneri postavljeni u izvršnoj vlasti svih nivoa, dva člana na prijedlog interesne organizacije mladih i žena Stranke i dva člana na prijedlog podružnica dijaspore uz suglasnost Predsjedništva Stranke.

Član 57.

Do održavanja Prvog kongresa Stranke, funkciju Glavnog odbora može obavljati Predsjedništvo Stranke izabrano na Osnivačkoj skupštini. Konstituirajuću sjednicu Glavnog odbora saziva Predsjednik Stranke. Glavni odbor bira predsjednika Glavnog odbora i dva zamjenika. Glavni odbor utvrđuje prijedlog Programa i Statuta Stranke, kao i drugih dokumenata koji se razmatraju na Kongresu. Na prijedlog Predsjedništva Stranke, Glavni odbor utvrđuje liste kandidata za organe Stranke koje bira Kongres. Glavni odbor raspisuje izbore u Stranci, izuzev prvih izbora koje raspisuje Predsjedništvo Stranke. Glavni odbor može, iz razloga racionalizacije, ovlastiti Predsjedništvo Stranke da obavlja i određene poslove iz nadležnosti Glavnog odbora. Sjednica Glavnog odbora održava se prema potrebi, a najmanje dva puta godišnje. Ukoliko Predsjednik Glavnog odbora ne sazove sjednicu u predviđenom roku, odbije prijedlog za sazivanje sjednice ili na drugi način pokuša izbjeći njezino sazivanje – sjednicu saziva Predsjednik Stranke, kao organ koji osigurava jedinstveno i cjelovito funkcioniranje Stranke, te određuje člana Glavnog odbora koji će tu sjednicu voditi. Obavlja i druge poslove predviđene Statutom i Poslovníkom.

Član 58.

Način rada i odlučivanja na sjednicama Glavnog odbora regulirat će se Poslovníkom.

Član 59.
(Predsjedništvo Stranke)

Predsjedništvo Stranke je najviši izvršno-politički organ Stranke. Predsjedništvo Stranke bira Kongres. Članovi Predsjedništva Stranke su: predsjednik Stranke, zamjenik predsjednika Stranke, dva potpredsjednika Stranke, Generalni sekretar Stranke i šest članova predsjedništva. Na Osnivačkoj Skupštini biće izabran Predsjednik Stranke, zamjenik Predsjednika Stranke, dva potpredsjednika, generalni sekretar i šest članova predsjedništva. Mandat ovako izabranog Predsjedništva Stranke traje do održavanja 1. Kongresa Stranke.

Član 60.

Predsjednik Stranke je po funkciji predsjednik Predsjedništva Stranke. Zamjenik predsjednika Stranke je po funkciji zamjenik predsjednika Predsjedništva Stranke. Članovi predsjedništva Stranke zadužuju se za određena područja rada. Predsjedništvo je zaduženo za političko upravljanje Strankom s ciljem njezinoga organiziranog i kontinuiranog djelovanja u političkom i javnom životu.

Član 61.

Ovlaštenja i nadležnosti Predsjedništva Stranke su:

Donosi odluke, zauzima stavove o aktuelnim političkim i drugim pitanjima;

U hitnim slučajevima može donositi odluke iz nadležnosti Glavnog odbora koje je dužano podnijeti na znanje Glavnom odboru Stranke na prvoj narednoj sjednici;

Raspravlja o potrebi izmjena Programa i Statuta Stranke i utvrđuje njihov nacrt;

Predsjedništvo Stranke organizira izbornu kampanju i može formirati Centralni izborni štab;

Predsjedništvo Stranke utvrđuje prijedlog akata i prijedlog kandidata Stranke za obavljanje funkcija;

Predsjedništvo Stranke za svoj rad odgovara Glavnom odboru i podnosi mu na razmatranje i odlučivanje pitanja od krupnijeg političkog značaja;

Donosi odluke i opće akte određene ovim Statutom;

Brine o informiranju unutar Stranke i donosi odluku o pokretanju internog glasila;

Donosi odluke o provođenju politike upravljanja imovinom Stranke;

Donosi Poslovnik o radu;

Donosi Pravilnik o kriterijima i načinu kandidovanja za izbore;

Analizira provođenje izbornih ciljeva i izborne strategije Stranke;

Predsjedništvo Stranke daje saglasnost na prijedlog vijećničke / odborničke liste Stranke koju utvrdi općinski, odnosno, gradski odbor, kao i na prijedlog kandidata za načelnike i gradonačelnike;

Predsjedništvo Stranke daje saglasnost na prijedlog liste kandidata Stranke koju općinski, kantonalni / regionalni odbori predlažu za nivo kantona, entiteta i države BiH;

Predsjedništvo Stranke, na prijedlog predsjednika Stranke, imenuje portparola Stranke i Generalnog sekretara Stranke;

Koordinira rad kluba poslanika, vijećnika Stranke i nosilaca funkcija u izvršnoj i zakonodavnoj vlasti BiH, Federacije BiH i Republike Srpske u cilju ostvarivanja politike Stranke;

Formira svoja radna tijela u skladu sa Poslovníkom;
Brine o kadrovskoj politici;
Predlaže i vodi finansijsku politiku;
Obavlja i ostale poslove u skladu sa Statutom.

Član 62.

Predsjedništvo Stranke može donijeti odluku o raspuštanju općinskih, gradskih, kantonalnih/regionalnih, mjesnih i interesnih organizacija Stranke u slučajevima:

Prestanka njihovog rada zbog čega se ne ostvaruju programski i politički ciljevi Stranke;
Djelovanja koje je suprotno osnovnim političkim i programskim ciljevima Stranke;
Ako pojedini organi organizacijskih oblika Stranke ne ostvaruju programske i političke ciljeve, Predsjedništvo Stranke može raspustiti takav organ, te inicirati sazivanje ili sazvati Skupštinu radi izbora novog organa;
Do izbora novih organa Predsjedništvo Stranke imenuje povjerenika koji je dužan u roku od trideset dana organizirati Skupštinu.

Član 63.

Sjednice Predsjedništva Stranke održavaju se u pravilu jednom u tri mjeseca, a saziva ih Predsjednik Stranke. U slučaju nesazivanja, odsutnosti ili spriječenosti Predsjednika Stranke sjednicu saziva zamjenik Predsjednika, na način utvrđen Poslovníkom. Ukoliko članovi Predsjedništva Stranke ne izvršavaju svoje obaveze i postavljene zadatke u skladu sa Poslovníkom, ili tri puta uzastopno neopravdano izostanu sa sjednice Predsjedništva Stranke, Glavni Odbor će donijeti odluku o zamjeni i izboru novih članova Predsjedništva na prijedlog Predsjedništva Stranke.

Član 64.

Predsjedništvo Stranke može formirati Statutarnu komisiju koja ima pet članova. Statutarna komisija tumači Statut i druga akta Stranke, te odlučuje o usklađenosti akata i o nadležnostima organa Stranke. Tumačenje Statuta i drugih akata Stranke, kao i odlučivanje o usklađenosti akata i o nadležnostima organa Stranke, mogu tražiti članovi i organi Stranke. Odluka, odnosno, tumačenje Statutarne komisije konačna je za sve organe i članove Stranke. Članovi Statutarne komisije ne mogu biti članovi drugog organa Stranke. Statutarna komisija donosi Poslovník o radu. Članovi Komisije moraju biti visokoobrazovani, po mogućnosti diplomirani pravnici.

Član 65.

Odluke Predsjedništva Stranke obavezne su za sva niža tijela Stranke, a u slučaju kolizije tih odluka s odlukama Glavnog odbora ili drugog organa, niža tijela dužna su ih primjenjivati do konačne odluke Glavnog odbora.

Član 66.
(Predsjednik Stranke)

Predsjednika Stranke bira Kongres. Predsjednik Stranke predstavlja i zastupa stranku i njome rukovodi u skladu sa Zakonom i Statutom. Predsjednik Stranke se bira na period od četiri godine. Prvi Predsjednik Stranke bira se na Osnivačkoj skupštini Stranke, na prijedlog Predsjedavajućeg Osnivačke skupštine Stranke.

Član 67.

Predsjednik Stranke predlaže Glavnom odboru potpredsjednike i članove Predsjedništva Stranke. Predsjednik Stranke saziva sjednice Predsjedništva Stranke i predsjedava im. Predsjednik Stranke može na prijedlog bilo kojeg tijela ili na vlastiti poticaj pokrenuti stegovni postupak protiv onog člana Stranke, a iz sastava bilo kojeg stranačkog tijela, ukoliko postoji osnovana sumnja o njegovom djelovanju suprotno Statutu, Etičkom kodeksu ili programu Stranke.

Član 68.

Predsjednik Stranke zabraniti će privremeno upis u registar članova svakog kandidata za člana ukoliko postoji saznanje da za to postoje prepreke za članstvo u Stranci utvrđene Statutom i o tome odmah izvijestiti Glavni odbor Stranke radi postupanja i odlučivanja. Predsjednik Stranke može donijeti odluku o suspenziji člana, uz uvjet istovremenog podnošenja zahtjeva za pokretanje stegovnog postupka.

Član 69.

Kandidate za predsjednika Stranke predlaže Glavni odbor Stranke ili najmanje jedna petina delegata Kongresa Stranke. Za predsjednika Stranke izabran je kandidat koji dobije natpolovičnu većinu glasova prisutnih delegata Kongresa. Ako nijedan kandidat ne dobije potrebnu većinu, izbor se ponavlja između dvojice kandidata koji su dobili najviše glasova. Izabran je kandidat koji u drugom krugu glasanja dobije više glasova.

Član 70.

Predsjednik Stranke ima ovlaštenja i nadležnosti:
Predstavlja i zastupa Stranku u javnom, političkom životu i pravnom prometu, u skladu sa zakonima, Statutom i Programom Stranke;
Osigurava jedinstvo djelovanja svih organa Stranke;
Saziva Kongres na osnovu Statuta;
Saziva i rukovodi Predsjedništvom Stranke;
U hitnim slučajevima može donositi odluke i zaključke iz nadležnosti Predsjedništva Stranke, s tim da na prvoj narednoj sjednici Predsjedništva Stranke traži potvrdu tih odluka i zaključaka;
Po potrebi, saziva Predsjednike općinskih i kantonalnih/regionalnih organizacija s ciljem utvrđivanja mjera za efikasno provođenje politike Stranke;

Upravlja imovinom Stranke i osigurava zakonitost poslovanja Stranke;
Obavlja i druge poslove u skladu sa Statutom stranke.

Član 71.

Predsjednik Stranke podnosi izvještaj o svom radu najmanje jednom godišnje Predsjedništvu Stranke, a izvještaj o četverogodišnjem radu Kongresu Stranke. Predsjednik Stranke zadužuje potpredsjednike i članove Predsjedništva Stranke za aktivnosti u provođenju pojedinih programskih područja, odnosno za neposredno provođenje politike stranke konkretnim političkim djelovanjem na državnom i lokalnom nivou.

Član 72.

Predsjednik Stranke može prije isteka mandata podnijeti ostavku uz obrazloženje. U slučaju ostavke Predsjednika Stranke ili ukoliko Predsjednik, odnosno zamjenik predsjednika Stranke bude višom silom spriječen da obavlja svoju funkciju, Glavni odbor Stranke određuje jednog od potpredsjednika Stranke za vršioca dužnosti predsjednika Stranke uz prethodnu saglasnost Predsjedništva Stranke.

Član 73.

Brisan.

Član 74.

(Generalni sekretar)

Generalni sekretar Stranke rukovodi radom Centralnog ureda Stranke sukladno odlukama Predsjedništva i Glavnog odbora Stranke i vodi Registar članova. Ustroj i nadležnosti Centralnog ureda Stranke uređuju se Pravilnikom o radu Centralnog ureda koji usvaja Predsjedništvo Stranke, a na prijedlog Sekretara. Generalni sekretar obavlja poslove organizacijske, administrativno-stručne i političke prirode, a u skladu sa odlukama i zaključcima Predsjedništva Stranke i Glavnog odbora. Generalni sekretar je zadužen za vođenje financija Stranke, te brine o izradi godišnjeg plana prihoda i rashoda, izvještaja o ostvarenju tog plana. Obavlja i druge poslove u skladu sa Statutom i odlukama organa Stranke. U slučaju duže odsutnosti ili spriječenosti u obavljanju poslova, Generalnog sekretara zamjenjuje član Predsjedništva Stranke kojeg odredi Predsjednik Stranke. Za svoj rad Generalni sekretar odgovara Predsjedniku Stranke i Glavnom odboru. Generalnog sekretara bira i opoziva Predsjedništvo Stranke na prijedlog Predsjednika.

Član 75.

(Portparol Stranke)

Za odnose s javnošću Stranka imenuje portparola na nivou Stranke. Djelokrug rada, ovlaštenja i odgovornosti portparola regulišu se posebnom odlukom Predsjedništva Stranke. Portparola Stranke bira i razrješava Predsjedništvo stranke na prijedlog Predsjednika Stranke ili 1/3 članova Predsjedništva.

Član 76.

Stranka ima Političku akademiju. Politička akademija osniva se odlukom Predsjedništva Stranke koje njome i rukovodi. Cilj osnivanja Političke akademije jest političko obrazovanje i usavršavanje, te podizanje nivoa političke komunikacije i kulture dijaloga članova Stranke. U okviru Političke akademije Stranke, formiraju se Stručna vijeća za određene oblasti javnih politika.

VI IZBORI, KANDIDIRANJE I OPOZIV

Član 77.

Svaki član ima se pravo pod jednakim uvjetima kandidirati za sve dužnosti u Stranci. Svi organi Stranke biraju se na period od četiri godine. Svi izbori za članove tijela Stranke su javni, ukoliko nije drugačije određeno odlukom Glavnog odbora Stranke. Za tijela Stranke koja čine jedan: predsjednik, sekretar, blagajnik itd. izabrani su kandidati koji dobiju natpolovičnu većinu glasova prisutnih članova. Za tijela Stranke u koja se bira više članova: Predsjedništvo, Glavni odbor, delegati u Skupštine i delegati za Kongres, izabrani su kandidati koji dobiju najveći broj glasova prisutnih članova, i to redoslijedom po broju dobivenih glasova.

Član 78.

Način kandidiranja i postupak biranja određuje Predsjedništvo Stranke. Način kandidiranja i postupak biranja članova tijela Stranke koji nije utvrđen ovim Statutom, utvrđuje se Pravilnikom o ustroju Stranke kojeg donosi Glavni odbor uz saglasnost Predsjedništva Stranke.

Član 79.

Opoziv pojedinih članova organa Stranke ili organa u cjelini, te njihovu popunu, može izvršiti samo ono tijelo koje je te članove ili tijela izabralo, osim u slučajevima kada je Statutom drugačije propisano.

VII KANDIDIRANJE I UČEŠĆE U VLASTI

Član 80.

Kandidate Stranke za zakonodavne, predstavničke i organe izvršne vlasti utvrđuju izvršni organi na odgovarajućem nivou organiziranja Stranke, u skladu sa odlukom o načinu predlaganja i opozivu kandidata koju donosi Predsjedništvo Stranke. Pripadnici oba spola moraju biti ravnomjerno raspoređeni na kandidatskim listama u skladu sa Izbornim zakonom BiH.

Član 81.

Članovi Stranke u zakonodavnim, predstavničkim i organima izvršne vlasti stvaralački iniciraju aktivnosti i zauzimaju stavove po svim pitanjima, sa stanovišta relevantnih programskih i drugih stavova Stranke. Nosioци javnih funkcija ispred Stranke dužni su izgrađivati i čuvati vlastiti javni i politički integritet, kao i ugled Stranke. Članovi Stranke koji ostvaruju dodatne prihode po osnovu vršenja zastupničkih i drugih funkcija dužni su izdvajati dio ovih primanja za Stranku u skladu sa odlukom Predsjedništva Stranke.

Član 82.

Zastupnici i vijećnici Stranke formiraju klub zastupnika, odnosno vijećnika Stranke radi usklađivanja svog djelovanja, zauzimanja stavova i vođenja parlamentarne aktivnosti. Članovi kluba zastupnika, odnosno vijećnika Stranke biraju predsjednika i zamjenika predsjednika kluba iz reda svojih članova uz suglasnost Predsjedništva Stranke. Predsjednik kluba zastupnika, odnosno vijećnika Stranke rukovodi radom Kluba i dužan je redovno izvještavati organe odgovarajuće organizacije Stranke o radu Kluba. Organ iz prethodnog stava je dužan razmotriti sva pitanja koja pred njega iznese Klub. Klub zastupnika, odnosno vijećnika Stranke donosi Poslovnik o svom radu.

Član 83.

U radu Kluba zastupnika, odnosno vijećnika Stranke učestvuju nosioci izvršne vlasti ispred Stranke, a po potrebi i predstavnici organa Stranke. U cilju provođenja programskih i političkih inicijativa, organ Stranke, odnosno nosioci izvršne vlasti ispred Stranke, mogu inicirati sastanak Kluba zastupnika, odnosno vijećnika Stranke.

Član 84.

Predsjedništvo Stranke koordinira rad klubova zastupnika, odnosno vijećnika Stranke na svim nivoima, održavanjem sjednica, uz učešće predsjednika Kluba zastupnika Stranke, odnosno Kluba vijećnika Stranke, nosilaca funkcija u zakonodavnoj i izvršnoj vlasti i predsjednika općinskih odnosno mjesnih organizacija Stranke u cilju ostvarivanja politike Stranke i pokretanja inicijativa. Za potrebe koordiniranog rada i saradnje predstavnika Stranke u zakonodavnoj i izvršnoj vlasti Predsjedništvo Stranke može utvrditi i druge oblike koordinacije.

VIII

IMOVINA, STICANJE, KORIŠTENJE I RASPOLAGANJE SREDSTVIMA STRANKE

Član 85.

Stranka ima imovinu. Imovinom upravljaju Organi Stranke utvrđeni ovim Statutom. Stranka se finansira u skladu sa Zakonom o finansiranju političkih stranaka. Finansijski plan Stranke donosi se u skladu sa Zakonom i ovim Statutom.

Član 86.

Organi Stranke odlukom utvrđuju kriterije i način sticanja, raspolaganja, upravljanja, korištenja i raspodjele materijalnih sredstava Stranke.

Stranka stiče sredstva od članarine, dobrovoljnih priloga, donacija, poklona, zavještanja, budžeta političko-teritorijalnih jedinica, prihoda od imovine, kao i iz drugih izvora, u skladu sa Zakonom.

Član 87.

Visinu članarine, način prikupljanja, uvjete za oslobađanje od njenog plaćanja, kao i način raspodjele tih sredstava, utvrđuju i uređuju Organi Stranke utvrđeni ovim statutom. Blagajnik organizacije je dužan da redovno prati ispunjavanje obaveza plaćanja članarine i o tome izvještava rukovodstvo Stranke.

Član 88.

Dobrovoljne priloge, poklone i zavještanja, Stranka prihvata ako se time neće kompromitirati, te pod uslovom da to nije u suprotnosti sa Zakonom o financiranju političkih stranaka. Za davanje saglasnosti o prihvatu nadležno je rukovodstvo organizacije u kojoj je poklon, dobrovoljni prilog ili zavještanje učinjeno, a ako se radi o nekretninama, Glavni odbor Stranke.

IX PRESTANAK RADA STRANKE

Član 89.

Stranka prestaje postojati na način i pod uslovima propisanim Zakonom, kao i na osnovu odluke Kongresa Stranke. U slučaju prestanka rada Stranke sva imovina Stranke pripada pravnim osobama koje se bave humanitarnim radom a koje odredi Kongres Stranke.

X PRIJELAZNE I ZAVRŠNE ODREDBE

Član 90.

Status člana na Osnivačkoj skupštini imaju svi osnivači Stranke. Predlagač svih dokumenata na Osnivačkoj skupštini je Inicijativni odbor za osnivanje Stranke. Kandidacijski postupak za izbor svih tijela Stranke na Osnivačkoj skupštini vodi Inicijativni odbor za osnivanje Stranke. Način, datum i kriterije za provedbu prvih unutarstranačkih izbora donijet će svojom odlukom Predsjedništvo Stranke.

Član 91.

Izmjene i dopune ovog Statuta vrše se na način i po postupku njegovoga donošenja. Akti Stranke

moraju biti usklađeni sa ovim Statutom. Glavni odbor Stranke može, izuzetno, između dva Kongresa, pojedina pitanja urediti i Statutarnom odlukom.

Član 92.

Ovaj Statut stupa na snagu danom donošenja.

U Velikoj Kladuši, 08.01.2018. godine

Predsjednica Stranke

Elvira Abdić Jelenović, mag. aedif